

MME IKỌ NDURI-UTỌŃ
Mme Hebrew 3:7-19; 4:1-13.
ỌYỌHỌ UKPEP-ŃKPỌ 434

Eke Ikpọ Owo

IKỌ IBUOT: “Koro ikọ Abasi enyene uwem, onyuñ ananam ñkpọ, onyuñ ọsọp akan kpukpru ofut iso iba, okim abahare ukpọñ ye spirit, ye ikek ye ndia; onyuñ enyene ukeme ndiduñọre ekikere ye uduak esit owo” (Mme Hebrew 4:12).

Nsuk-Uyo Israel

Nnyin imọfiọk ibaña ediwak nsuk-uyo Nditọ Israel ke ini nduyo mmọ. Akpa nsuk-uyo mmọ ekedi ke mben Ididuot Inyañ ke adaña emi mmọ ekedọhọde Moses ete, “Ndi koro udi mikoduhe ke Egypt esin afo ada nnyin edi ke wilderness, man nnyin ikpaña?” (Exodus 14:11). Mmọ eketiñ emi enọ Moses, edi Abasi ama okop. Edi Abasi ama ada mmọ ebe Ididuot Inyañ ke ọkpọsọñ ubọk.

Emi ekedi kiet ke otu ñwọrọ-nda ñkpọ ke Israel eke andiwet ñwed emi, andiwet Psalm, ye mme anditiñ ntiñ-nnim ikọ ekese nte kiet ke otu mme ikpọ uwọrọ-ufin ke ñwed mbuk mmọ. Edi ke adañaemi mmọ mikefreke kaña ikpọ utibe-ñkpọ emi Abasi akanamde ke ndida mmọ mbe Ididuot Inyañ ke nsat-isọñ nduk ke akpa-utatan, mmọ ema esuk uyo ebaña udia.

Kpa ke ini oro, Abasi ama anam utibe-ñkpọ efen ke ndidọñ manna oto ke Heaven edi, emi ekepede nte edim kpukpru usen ke ofuri isua aba. Ukpeme emi Abasi ekekpemede mmọ ke ndinọ manna emi iketreke, tutu mmọ ebe Jordan, eke duk ke Isọñ Eñwọñ, kpa ebiet emi mmọ ekekemede ndinyene udia. Ntre, emi ekedi mme ikpọ utibe-ñkpọ iba emi Abasi akanamde, ukperedem oro ekedi utibe-ñkpọ emi akadade itie kpukpru usen nditi mmọ ofuri ini mbaña ukpeme emi Abasi ekpeme mmọ ye utibe usuñ emi Enye adade ọbọk mmọ.

Ke oro ekebede, ikebighike mmọ ema esim akpa-utatan; ebiet emi mmọ mikenyleneke mmọñ, mmọ ñko ema etọñ ntak esuk uyo, ndien Abasi ama ọnọ uñwam esọk mmọ, onyuñ ọdọhọ Moses ete etiñ ikọ ọnọ itiat, ndien mmọñ ama ọwọrọ. Ndien mmọ edi ke Obot Sinai; ke adañaemi Moses okosuk odude do ke enyọñ obot ke usen aba, mmọ ema edọhọ, “Daha ke enyọñ nam abasi kiet nọ nnyin, eke edibemde nnyin iso aka: koro ama edi Moses, owo emi akadade nnyin ke isọñ Egypt, ọdọk edi, nnyin ifiọkke se itibede ye enye”(Exodus 32:1).

“Edi ediwak owo ke otu mmọ ikenemke Abasi esit; koro Enye asuan mme okpo mmọ ọduọñ ke desert.

“Mme ñkpọ emi edi uwut-ñkpọ enọ nnyin . . .” (1 Ñwed Corinth 10:5, 6).

Nnyin imenyene ata uwut-ñkpọ emi mme andiwet Obufa Ediomu edade eto mme ñkpọ-ntibe emi ekebede ye se mbon Abasi eke kutde unen ndinam ye se mmọ mikekemeke ndinam nte mme item, mme uwut-ñkpọ ye ikọ nduri-utọñ emi enyenede fi ye ami mfin.

Mfiak-edem

“Ekpeme mbak ndusuk idiọk esit unana mbuotidem edidu owo mbufo kiet ke idem, ke eriwoñọre ñkpọñ Abasi uwem:” (Mme Hebrew 3:12).

Ikọ emi “eriwoñọre” ñkpọñ Abasi edi ikọ emi nnyin inyenede ito “akpatre idiọk itie mfiak-edem” ndinyuñ “nduo ñkpọñ mbuotidem.” Oro ọwọrọ, ndifiak edem ñkpọñ Abasi ke usuñ nte edikabare esit miduhe, emeghe ke esit inyuñ ikemeke ndikpuhọre aba. Ke owo ọsuhọrede osim utọ idaha emi, enye eyenyene mbukpo ekikere. Ikọ Abasi anam ifiọk ete ke edi mmem-mmem ñkpọ ọnọ owo emi ama ọkọbọ uñwana onyuñ ọfiọk akpanikọ emi odude ke ikọ abasi, ndisim utọ idaha oro.

Imenyene ikọ emi iyomde ndikot, emi owo kiet emi akabakde Abasi ke eyo Wesley eketiñde abaña ñkpọ emi.

“Mme ikọ emi (tọ̀nọ́de ke ufań ńwed itiaba tutu osim akpatre ibuoť ńwed oro) enehere ewut ukem-ukem nte ofuri ńwed emi owutde ete, ke owo emi ama ekenyene ọ́yọ́họ́ mfọ́n Abasi, ekeme ndifiak edem onyũ atak ke nsinsi. Ke esiode utọ́ ekikere emi efep, mme ikọ́ emi ye mmọ́ efen eke etiede ntre, emi ewakde ekan mbahare iba ke itie ita ke edisana ńwed Abasi ikpenyeneke iwuk ikponyũ iwọ́rọ́ke baba ńkpọ́ ndomokiet. Nso utọ́ idiọ́k mfańa ke mme owo eda emum nsu-nsu ukpep-ńkpọ́ ekama man eda eńwana ye kpukpru se idude ke ikọ́ Abasi. Mme angel ema eduọ́, Adam ama ọ́duọ́, Solomon ama ọ́duọ́ ye ekese mmọ́ emi ekedide mme andinim ke akpanikọ́ ema eduọ́nọ́; ke kpukpru emi, nte nnyin ifiọ́kde, ndomokiet ikọ́tọ́nọ́ke ntak aba idaha ke enyọ́n. Edi ndien, ke etetiń enọ́ nnyin ete ke nnyin ikemeke ndiduọ́k mme mfọ́n erinyańa nnyin. Satan akada ukpep-ńkpọ́ emi ekpep akpa ete ye eka nnyin, mmọ́ ema enim enye ke akpanikọ́, enam idiọ́k, enyũ eduọ́, ndien eda nsobo enọ́ ofuri ererimbot.”

ńwed efen itińke otim ańwańa nte ńwed Mme Hebrew ndiwut ete ke nsinsi erinyańa iduhe inọ́ owo eke afiakde edem.

Nduọ́k-odudu

Wọ́nọ́re idahaemi ka ke ufań 11:

“Mma ńńwọ́nọ́ ke iyaresit nte, Mmọ́ ididukke ke nduọ́k-odudu Mi.”

Ikọ́ emi “nduọ́k-odudu” etiń abańa Canaan. Ikọ́wutke ite ke mmọ́ editie ifu ke mmọ́ ema ekesim Canaan. Akana eńwana mme ekọ́n enyũ ekan, edi ke utit mme ekọ́n, mmọ́ eyedu ke emem ye edidiọ́n isọ́n Canaan. Mmọ́ ema enyene mme ińwań vine emi mmọ́ mikọ́tọ́họ́ ye ińwań olive emi mmọ́ mikakpaha utom ke esit. Mme obio emi mmọ́ mikọ́bọ́pke ekenyene ndidi eke mmọ́. Oro ekedi utọ́ nduọ́k-odudu emi Abasi ọ́kọ́ńwọ́nọ́de ọ́nọ́ mmọ́ ke isọ́n Canaan.

Nduọ́k-odudu eke ererimbot odu emi edide mbiet nduọ́k-odudu eke Heaven emi Abasi onimde ọ́nọ́ nditọ́ Esie. Oro edi ibuoť ikọ́ emi andiwet adade ekpep ke ebiet emi. Ami nnimke ke akpanikọ́ nte ke nduọ́k-odudu nnyin ke heaven edidi ifu-ifu nduọ́k-odudu ikpuhọ́re ye utọ́ nduọ́k-odudu oro Nditọ́ Israel ekenyenede ke isọ́n Canaan. Ami mmonim ke akpanikọ́ nte, do ke Ediye Obio oro Abasi ọ́ńwọ́nọ́de ọ́nọ́ ikọ́t Esie, nnyin iyenam utom ke esit. Utọ́ utom eke edidide, nnyin ifiọ́kke. Edi ńkpọ́ kiet odu, nnyin iyenene ikpọ́hidem: eyekpuhọ́re mme mbiara ikpọ́hidem emi esin ke mbiet ikpọ́hidem ubọ́n Ọ́bọ́n ye Andinyańa nnyin. Ikpọ́hidem emi nnyin inyenede idahaemi ikemeke ndibuana ke ntań-ndọ́k me ke idara obio oro. Nnyin iyedara ke mme edidiọ́n oro kpa nte akanade eda Israel eduk ke Isọ́n eńwọ́nọ́ man enye ọ́kọ́bọ́ mme edidiọ́n oro.

Mme edididọ́n oro ebe adańa nte owo ekemedede ndikere. Paul etiń ọ́nọ́ nnyin ete, “Se enyin mikekwe, utọ́n mikonyũ ikopke, Se minyũ idukke owo ke esit ndikere, ńkpọ́ ekededi eke Abasi ekebeńede onim ọ́nọ́ mmọ́ emi emade Enye” (1 ńwed Corinth 2:9).

John ke Isuo Patmos, ama okut mmọ́, edi ikọ́ baba kiet ikoduhe ndida ntiń otim ańwańa man ekeme ndiduk owo ke esit, ke abańa mme utọ́ edidiọ́n eke ekponde ntre.

Nditaba

Nditọ́ Israel emi eketakde, ekekokoi esio idem mmọ́ efep ke mme edidiọ́n emi. Ekedi mmem-mmem ńkpọ́ ọ́nọ́ mmọ́ ndibe nduk, edi ke ini mmọ́ ema ekedọ́k ekesim adańa isọ́n oro, enyũ esobode ye mme mfina ye ńkpọ́ ubiọ́nọ́ emi ekedade ke iso mmọ́, ekpri mbuọ́tidem oro mmọ́ ekenyenede okpu; mmọ́ ikenyũ ikemeke aba ndikut akwa Jehovah ye ubọ́k Esie emi atatde ọ́nọ́ mmọ́. Kpukpru se mmọ́ ekekemedede ndikut ekedi nnyan-mkpọ́sọ́n owo ye ńkoń-ńkoń ibibene obio emi ekedide mme ńkpọ́ ubiọ́nọ́ enọ́ mmọ́ ndibe nduk ke isọ́n oro.

Mmọ́ ema efre ebańa mme utibe-ńkpọ́ emi Abasi akanamde, ndien se ikotibede ekedi ndinam mmọ́ efiak ekeyo ke akai-ikọ́t ke isua 38. Jehovah ọ́kọ́ńwọ́nọ́ ete ke mmọ́ ididukke ke esit. Mme okpo mmọ́ ndikọ́duọ́nọ́ ke akai-ikọ́t ikedighe ubierikpe emi Abasi akaduakde-duak ndinọ́ mmọ́, edi ekedi se mmọ́ ekemekde ke idem mmọ́.

“Koro nnyin imakabare idi mme abuana ńkpọ́ ye Christ, edieke nnyin isọ́nọ́de imum mbuọ́tidem eke ikenyenede ke eritọ́nọ́ tutu osim akpatre” (Mme Hebrew 3:14).

Tim se mme nkpo emi enyenede ndinam mbemiso ebe eduk. Idighe kpukpru owo emi etoñode mbuba esisim utit. Ata akpan nkpo edi afo ndikure mbuba oro, ndien kpukpru owo eyefiok ete ke afo ama otoño ndifehe.

Ikọ oro “mbuotidem” ọworo itiat-ukot-ufok. Ntak iduhe ndinyene ndik mbaña Itiat-ukot-ufok emi ndiduo ; koro Itiat-ukot-ufok oro ọsọnde ada. “Koro baba owo kiet ikemeke ndinim itiat-ukot-ufok efen mbe se ema ekenim, emi edide Jesus Christ” (1 Nwed Corinth 3:11). Ebọp nnyin edori ke Itiat-ukot-ufok oro, oto mbufiok emi nnyin inyenede ito Enye. Itiat-ukot-ufok emi idibiarake idinyuñ imemke; edi ọsọñ idem akan mme obot. Edi ndik odu ke owo ndifionore nkpoñ Itiat-ukot-ufok nnyin. Ekese owo ke enam ntre.

“Ke adañemi edohode ete, Mfin ...”

Ikọ oro “mfin” ọworo idahaemi. Ekenyene nditọ Israel ke usen emi andiwet Psalm ekewetde; ekenyene mme Hebrew emi ekedide mme anditiene-Christ ke usen emi Paul ekewetde; ndien onyuñ enyene fi ye ami ke adañaemi nnyin idude uwem. Ọbọñ okpokpono ikọ emi “mfin” ke ofuri ñwed Esie. Edi ukem nkpo emi ke Paul eketiñ abaña ke ini ọkọdohode: “Sese, usen erinyaña mi.”

“Enye okonyuñ ọñwoño ọno mme anie ete, mmọ ididukke ke nduok-odudu Imọ, ke mibohoke mbon ntut-utọñ?” (Mme Hebrew 3:18).

Unana erinim ke akpanikọ ekedi isin kpukpru afanikọñ emi okosimde nditọ Israel ke akai-ikot. Se inyuñ idade afanikọñ isok ererimbot mfin edi oro. Unana erinim ke akpanikọ ọkotoño ke Iñwañ Eden ke adañaemi Satan okobupde akpa ete nnyin ete, “Nte Abasi ọkotoño?” ndien onuk mbume oro esin ke esit mmọ; ọtoñode ke ini oro tutu osim mfin emi, mbume oro osuk akaka iso odu ke esit mmọ emi mimanake obufa kaña. Kpukpru nnyin ikamana ye uduot akpa ete nnyin. Ndien do ke kpukpru idiok ye ukwañ-nkpo ye isuñi emi enyenede ererimbot emi eketoño. Unana erinim ke akpanikọ!

“Mmọdo sia uñwoño ediduk ke nduok-odudu Esie ọsuhode, eyak nnyin ifehe ndik, mbak owo mbufo ekededi editie nte nkpo eke atabade nduok-odudu oro” (Mme Hebrew 4:1).

Ikọ emi “nditaba,” eda enye eto mbre emi mme Greek ekesibrede. Edieke owo mikemeke ndikan ke mbre oro, ekesidohọ ete ke enye ataba. Ebiet eke owo ekededi atabade, ekpekpri nte ekpekpri ebat ete enye idighe andikan. Andiwet okototim emek ndida ikọ emi koro kpukpru se idude, edi ke owo oro ataba, ndusuk ayak ata esisit ndikan, ndien enye amataba.

Mme Ntak Editaba

“Koro ke akpanikọ ema ekworo gospel enọ nnyin, kpa nte ekekwooro enọ mmọ; edi ikọ eke mmọ ekopde inamke mmọ ufon, koro mikadianake ye mbuotidem ke esit mmọ emi ekopde” (Mme Hebrew 4:2).

Ikọ oro “ndidiana” eda enye eto usuñ nte udia esisañade asuana ke idem owo. Kpa nte ediade udia esin ke ekpa, do enye abuaha ye se itode owo ke idem mbemiso ekeme ndinam ufon, ntre ke Ikọ Abasi enyene nditim mbuaha mbemiso enye enyene ufon ọno ukpoñ. Emi eberere usuñ ọno nnyin ndikere nkpo.

Imokut mi ndien, nkpo emi anade enyene mbemiso edikop Ikọ Abasi odoro owo udori. Se adaña ukpuhore emi ekemedede ndidu ke otu mmọ emi ekopde ukem Ikọ emi!

Edi oruk owo inañ ke ekewut ke ñke asuan-mkpasip. Kpa ukem-ukem mkpasip ke ekesuan ke itie inañ emi, oro edi, kpukpru ekedi nti mkpasip; ndien Ikọ ñko onyuñ edi eti. Edi nte ekekopde ọkodiok. Ye ndusuk owo udori ikoduhedu; ye ndusuk owo enye odoro esisit edi ke ekpri ini abiara. Edi ye ndusuk owo odoro esisit okpon akan, edi ekikere ye inemesit uwem emi, ebaba Ikọ emi ewot. Edi eti ison ama odu emi okodorede udori, ndusuk onwum edip ye duop, ndusuk ata, ndusuk onwum ikikie.

Osuk akaka iso odu ntre ke kpukpru emana owo tutu emi. Ndsuk owo ke enyenyene udori eto enye, ndusuk owo inyeneke. Nso idi ukpuhore? Ikotimke ibuaha, kpa nte ekedide ye Nditọ Israel oro ke akai-ikot. Mmọ ekenyene unana eribuaha eke spirit. Ikọ emi ekenode ama enyene kpukpru nti nkpo ke esit emi ekemedede ndinọ nsọñ-idem. Ke nditim ntiñ, enye enyene mme ndia emi odude ke udia, emi

enamde idem eye, enyuñ enođe odudu ye mme ñkpọ eken. Inanake baba ñkpọ kiet ke esit. Ikọ Abasi ọfọn ama.

Ikọ Abasi odu emi ekemde ye idaha uwem kiet ekededi. Oro edi kiet ke otu mme ufọn emi odude ke ndikpep Akani Ediom: kpukpru ñkpọ emi Nditọ Israel ekesañade ebe ke esit, enyene utom eke ekemde ye kpukpru se itibede ke uwem anditiene-Christ. Edi akpanikọ ete ke se ikotibede ke ndusuk idaha ke Akani Ediom, akabaña ñkpọ uwem emi; edi ye anditiene-Christ mfin, oyom ukem-ukem nsọño-nda, ukem mbuotidem, ukem edinim ke akpanikọ, ukem uko, ukem uduak ndisim utit kpa nte ekedide ye nditọ Israel ndida nduk isọñ Canaan, nnyuñ ññwana ñkan ofuri-ofuri.

Kpa ntre ñko, ekọñ ye isọñ odu nnyin ke iso, emi anade nte iñwana ikan mbemiso ida inyene. Man ikut unen, oyom inyene ukem nti ido oro ke uwem fo ye okim, nte ekeyomde ke uwem Nditọ Israel oro. Oro edi ntak emi ikutde nte kpukpru se ikotibede ke uwem mmọ asañade ekekem ye se idade itie ke uwem anditiene-Christ. Ikọ Abasi ọnọ kpukpru mme uwut-ñkpọ ye ewuhọ, mbet ye mme item, ikọ nsọño-idem ye nda-usuñ emi anditiene-Christ oyomde.

Ọfọn nnyin ndinyene mbufiok efen ke ebede eke mfre nnyin emi; nnyin inyene ndinyene mme ukeme efen emi ekande mme ukeme eke etode ke ifiok nnyin, edieke iyomde ndikpep Ikọ emi nte ekemede ndidoro nnyin udori. Ke ediwak idaha, mme owo ekpep Ikọ Abasi nte ọsuhorede ekekem ye mbufiok mmọ. Emi itimke idoro nnyin udori, oro edi, ukem-ukem nte edinam obukidem; edi Abasi enyene se ifoñde ikan oro ọnọ nnyin. Abasi oyom nnyin inim edinam eke Spirit ikan eke ibuot nnyin. Enye oyom Ikọ oro oduk esit akan idaha ifiok nnyin. Abasi oyom nnyin inyene ukeme eke idade inam ñkpọ man oto do, nnyin ikpekeme ndida kpukpru nti ido ye inyene emi odude ke Ikọ nnyene man akabare edi mbak ukpọñ nnyin, enyuñ enam nnyin ikọri ke edisana mbuotidem emi, man isim ọyọhọ idaha Christ.

Mbufiok Anditiene-Christ

Se edade edian man ekeme ndibuaha edi mbuotidem. Ekikere obukidem ye esit eke mimanake obufa ikemeke ndibọ mme ñkpọ Abasi, koro edi spirit ekpep owo. Nnyin imenyene obufa ukeme emi enođe nnyin ke ndo-ndo oro nnyin imanade obufa, Spirit odu-uwem Abasi emi esinde ke esit nnyin ada mbuotidem edi. Enye itoho nnyin ke idem, enye edi enọ Abasi; ntre enye oto ke enyoñ. Se inyenede ndinam edi ndikabare ntiene mme item emi Abasi ọnọde nnyuñ nnam mmọ. Ndien se isuhọde Abasi eyenam. Enye eyekut ete imọnọ ukeme.

Anditiene-Christ enyene ifiok emi ediande enọ enye nte ekpedọhọde ete ọyọhọ itiokiet. Imekeme ndifiok mme ñkpọ ererimbot oto ke nda-mmana ifiok nnyin, ke edikut, edikop, editabi, ediñwune ye editotuk; edi ke etiñde ebaña mme ñkpọ Abasi, nnyin iyekut ite ke mme ifiok ition emi nnyin inyenede ikemke. Mmọ idiñwamke. Edi akpanikọ nte ke nnyin ida enyin ikot Ikọ Abasi; edi ke idak mme ikọ emi ewetde ke mme ikpa-ñwed emi, ñkpọ mmọdo emi anade nnyin imum ikama. Ndien ke ntak emi, eyeyom ọyọhọ ifiok itiokiet emi Abasi ọnọde nnyin.

Edi utibe-ñkpọ ndikut nte Enye onukde nnyin esin man ifiok, inyuñ inyime Ikọ, man akabare edi ọkpọ ye obuk nnyin. Oro edi se Jesus eketiñde abaña ke ini ọdọhọde: “Ke akpanikọ ke ndọhọ mbufo, Edieke mbufo midiaha obukidem Eyen owo, minyuñ iñwoñke iyip Esie, mbufo inyeneke uwem ke esit mbufo” (John 6:53). Ke ekpri ini ama ekebe, Enye anam otim añaña ke ndidọhọ: “obukidem inọñ owo baba udori kiet, mme ikọ oro ñketiñde nnọ mbufo edi spirit enyuñ edi uwem.”

Akpanikọ akayarade idem ke ini Akani Ediom ebe ke eyen-erọñ emi ekewotde. Nditọ Israel ekenyene ndita ofuri erọñ emi; man asuana oduk ndido idem mmọ, onyuñ akabare edi obuk ye ọkpọ mmọ. Eyen-erọñ oro edi Ikọ Abasi. Kpa ke ukem usuñ oro ke akabare edi ọkpọ ye obuk nnyin. Udomo mbuotidem nnyin ndien enyene ndiwut idaha udori emi Ikọ Abasi odorode nnyin.

Ñwọrọ-nda ñkpọ efen edi emi: “Ntre ke mbuotidem oto ke erikop, erikop onyuñ oto ke ikọ Christ” (Ñwed Mbon Rome 10:17). Kpa nte ñkpọ emi añwamde udia ndisuana nduk ndido idem otode udia emi ediade, kpa ntre ke Ikọ Abasi emi nnyin ibođe akabarede edi mbuotidem ke esit nnyin, emi añwamde nnyin ndibọ Ikọ emi nda. Mbiba esaña ọtọ kiet enam utom. Adaña nte nnyin ibođọ Ikọ Abasi, kpa ntre ke mbuotidem nnyin ọkọri; nte mbuotidem nnyin okpokpon, ntre ke nnyin inyene ukeme ndibọ Ikọ nnyuñ nda Enye nsin ke uwem nnyin.

Ñka-iso Nduok-odudu

“Koro nnyin emi ima inim ke akpanikọ ibe iduk ke nduok-odudu oro: kpa nduok-odudu eke Enye etiñde abaña ke ini Enye ọdọhọde ete, Mma ññwọñọ ke iyaresit Mi, Nte, mmọ ididukke ke nduok-odudu Mi, okposuk edi nte Enye ama akanam utom Esie ama toto ke eritọñọ ererimbot” (Mme Hebrew 4:3).

Ke esede, eyekut ete ke ikọ oro “duk” edi ikọ emi abañade idahaemi. Nnyin itọñọ ndibe nduk ke nduok-odudu nnyin ke ndo-ndo oro ikabarede esit; emem oro nnyin inyenede edi ñtọñọ editabi se idide udeme eke idinyenede ke Heaven. Nnyin inyuñ ikaka iso iduk ke nduok-odudu oro, edi idifiokke ọyọhọ-ọyọhọ tutu osim usen emi Ọbọñ edidide nditañ ikọt Esie nnyọñ.

Se ibañade erinyaña edi utom emi akadeka iso ọkọri, okpon, onyuñ atara tutu nnyin ibe iduk ke mfọn-mma emi Abasi ke Idemesie akaduakde ndinọ nnyin.

“Koro Enye ọdọhọ ke ebiet kiet abaña ọyọhọ usen itiaba ntem ete, Ndien ke ọyọhọ usen itiaba Abasi ọkọduok odudu ke kpukpru utom Esie” (Mme Hebrew 4:4).

Idahaemi enye ke afiak aka mbiet akpa nduok-odudu emi, kpa nduok-odudu oro Abasi ekenyenede ke ini Enye okurede utom eribot. Kpukpru mme sabbath emi nditọ Israel ekenyenede ke ido ukpono Abasi mmọ, ọkọkọñọ ke mbiet oro. Mmọ ema enyene mme sabbath ke urua ke urua; enyuñ enyene Sabbath mme Urua emi ke ukperedem ekekotde, Pentecost. Mmọ ema enyene sabbath eke ọfiọñ emi mmọ ekesinimde ke kpukpru ọfiọñ itiaba, emi ekekotde Usọrọ mme Ataya. Ema enyuñ enyene sabbath eke mme isua: Kpukpru ọyọhọ isua itiaba ekedi isua nduok-odudu emi akanade nte isọñ ana ikpikpu, owo itọhọ ñkpọ, onyuñ ana ekpuhọre ñwed isọñ, emi mme ifin emi emade ndiwọrọ ke idak mme ete-ufok mmọ ekemade ndinam ntre. Ndien sabbath eke kpukpru isua itiaba ama odu, emi kpukpru ọyọhọ isua aba ye duop ekedide isua Jubilee. Kpukpru mme edinam sabbath emi, ekenim etiene akpa mbiet emi ekenọde ke Genesis ke ini Abasi akanamde ererimbot; ntak oro anam nnyin inim ke akpanikọ ite ke Sabbath eke tọsin isua eyedu.

Etie nte Abasi anam utom ke udomo tọsin isua kiet, emi etiñde ke Ñwed Abasi, ete ke etie nte usen kiet. Nnyin idu idahaemi ke utit ọyọhọ tọsin usen itiokiet, ñkpọ nte tọsin isua itiokiet. Emi edi ntak kiet emi anamde nnyin inim ke akpanikọ ite ke nnyin imenehere ikpere akwa Tọsin-Isua ukara emi oyomde ndisọp nda itie ke isọñ.

“Mmọdo nduok-odudu sabbath ọsuhọ ọnọ ikọt Abasi.”

Edi akpanikọ nte ke ikọ emi “nduok-odudu” enyene akwa ukpuhọre ye nduok-odudu emi enye etiñde abaña ke kpukpru mme ebiet eken. Nduok-odudu emi enye etiñde abaña ke Canaan edi utọ enye emi owo ekemedede ndida ke enye ama okokure ọkposọñ utom esie. Edi ikọ emi ọwọrọ sabbath. Mi enye etiñ abaña akpa sabbath, kpa sabbath emi Abasi okonimde ke eritọñọ. Mi ñko, enye etiñ abaña nduok-odudu sabbath koro emi ọfọnde akan, onyuñ okoñde, onyuñ okponde akan utọ nduok-odudu oro mmọ ekenyenede ke ini mmọ ema ekeduk Canaan. Emi edi nsinsi nduok-odudu; nduok-odudu oro enyene nditọ Abasi.

Nduok-odudu Obufa Obot

“Koro owo ama okoduk ke nduok-odudu Abasi, enye odop utom esie, kpa nte Abasi okodopde utom Esiemọ” (Mme Hebrew 4:10).

Emi abaña kpukpru mme anditiene-Christ, koro owo emi odukde ke nduok-odudu ama etre kpukpru utom esie, nte Abasi akanamde ke eke Esie. Edi sia Jesus ama ọkọdọk ke Heaven ke ini utom Esie mi ke isọñ ama okokure, mmonim nte emi abaña Jesus, andisiak usuñ mbuotidem nnyin ñko. Kpa nte Abasi ọkọduokde odudu ke kpukpru utom Esie ke akani obot, kpa Akani Ediomi, kpa ntre ke Jesus ọkọduok odudu ke kpukpru utom Esie ke obufa obot.

Paul ọkọdọhọ ete, “Ntem edieke owo odude ke Christ, ema ebọt enye obufa” (2 Ñwed Corinth 5:17), me, “obufa obot”, nte nnyin ikemedede ndikabare enye. Nnyin idu ke obufa obot, idighe ke akani. Emi edi usuñ efen emi ikemedede ndida Ini ibet ndomo ye Ini mfọn; ndien Christ edi andibot obufa emana. Enye okoduk ke nduok-odudu Esie ke ini emi Enye ekesetde ọwọrọ ke udi ke akpa usen urua.

Do ke nnyin inyene isõn ndikpono Abasi ke akpa usen urua. Ke idak obufa eribot, emi afo ye ami idude ke esit idahaemi, Christ ke ama okokure kpukpru utom Esie, ama okure kpukpru se ekedõnde Enye. Mme akpatre ikõ Esie ke Krõs Calvary ekedi; “Okure.” Enye ama onyũn oduk ke nduõk-odudu Esie ke Enye ama ekeset ke mkpa õwõrõ ke udi ke õyõhõ usen ita ke akpa usen urua. Ke ntre nnyin imenyene õyõhõ isõn ndinim Usen Qõbõn nte sabbath.

Ofut Abasi

“Koro ikõ Abasi enyene uwem, onyũn ananam ñkpõ, onyũn õsõp akan kpukpru ofut iso iba, okim abahare ukpõn ye spirit, ye ikek ye ndia; onyũn enyene ukeme ndiduõre ekikere ye uduak esit owo” (Mme Hebrew 4:12).

Afo emekeme ndien ndikut ufõn emi odude ke owo nditim ñkop Ikõ Abasi. Edieke nnyin inamde enye, enye eyenam utom ke esit nnyin.

“Baba ñkpõ eke odibede Enye ke enyin inyũn iduhe; edi kpukpru ñkpõ ena iferi ye ata iñwañ-iñwañ ke enyin Abasi, emi nnyin isañade ñkpõ ye Enye” (Mme Hebrew 4:13).

Ke nditim ntiñ, owo kiet kiet eyeda ke ikpe ke iso Esie usen kiet, ndien ñkpõ ndomokiet ididibeke, owo idinyũn ifukke; edina añwa-añwa. Edida Ikõ emi enyenede uwem, onyũn enyenede odudu, onyũn õsõpde akan kpukpru ofut iso iba ekpe ikpe ebierenõ nnyin. Jesus ke Idemesie õkõdõhõ ete:

“Ñkedighe ndibiene ikpe nnõ ererimbot, edi ñkedi ndinyaña ererimbot . . . ikõ eke ñketiñde, kpa ikõ oro edibiene ikpe õnõ enye ke akpatre usen” (John 12:47, 48).

Imekeme ndimek ndinyime ndikop Ikõ oro idaha emi ndien eda enye ekpe ikpe nnyin man enye ñko õduõre nnyin, me, ndida ke akpatre usen, ndien eda enye ekpe ikpe nnyin ini oro. Oro edi ekikere emi enye osiode onim ke utit item emi.